



Broj, 01-07-10-51-248/2024  
Sarajevo, 14.11.2024. godine

Na osnovu člana 25. stav (1) i člana 26. stav (4), a sve u vezi sa članom 19. st. (5) i (6) Zakona o slobodi pristupa informacijama na nivou institucija Bosne i Hercegovine ("Službeni glasnik BiH", br. 61/23) i člana 5. Pravilnika o postupanju po zahtjevu za pristup informacijama Visokog sudskog i tužilačkog vijeća Bosne i Hercegovine br. 08-02-3075/2010 od 2.9.2010. godine, 08-02-3645/2013 od 24.9.2013. godine, 08-02-388-1/2014 od 22.1.2014. godine i 08-07-2-3459/2021 od 29.9.2021. godine, rješavajući po zahtjevu za pristup informacijama Renate Radić-Dragić, [REDACTED], od 5.11.2024. godine, predsjednik Visokog sudskog i tužilačkog vijeća Bosne i Hercegovine donosi

## RJEŠENJE

**I Odobrava se** zahtjev za pristup informacijama o načinu pristupa zapisniku sjednice Visokog sudskog i tužilačkog vijeća Bosne i Hercegovine održane 16. i 17. oktobra 2024. godine.

**II Odbija se** pristup materijalima 25. tačke dnevnog reda sjednice Visokog sudskog i tužilačkog vijeća Bosne i Hercegovine održane 16. i 17. oktobra 2024. godine pod nazivom *Informacija o dostavljenim sudskim i tužiteljskim odlukama o završetku predmeta zbog nastupanja zastare kaznenog ili prekršajnog gonjenja za razdoblje 1.1.- 30.6.2024. godine.*

## Obrazloženje

Visoko sudsko i tužilačko vijeće Bosne i Hercegovine (u daljem tekstu: VSTV BiH/Vijeće) je 5.11.2024. godine zaprimilo zahtjev Renate Radić-Dragić, [REDACTED] (u daljem tekstu: podnositeljica zahtjeva) za pristup informacijama kojim se traži Informacija o dostavljenim sudskim i tužiteljskim odlukama o završetku predmeta zbog nastupanja zastare kaznenog ili prekršajnog gonjenja za razdoblje 1.1.- 30.6.2024. godine, koja je bila na dnevnom redu sjednice VSTV-a BiH 17.10.2024. godine, kao i zapisnik sa te sjednice ukoliko je u međuvremenu izrađen.

Razmatrajući predmetni zahtjev, u skladu s nadležnostima VSTV-a BiH, utvrđeno je sljedeće:

U odnosu na tačku I izreke rješenja, uvidom u službenu evidenciju utvrđeno je da je zapisnik sjednice VSTV-a BiH održane 16. i 17. oktobra 2024. godine objavljen na web stranici VSTV-a BiH <https://vstv.pravosudje.ba> u kategoriji VSTV BiH/Sjednice/Zapisnici, odnosno da je dostupan javnosti putem linka: <https://vstv.pravosudje.ba/vstvfo/B/141/kategorije-vijesti/1172/1175/115856>, te se isti ne dostavlja kao poseban prilog ovog rješenja budući da predstavlja informaciju koja je javno objavljena, o čemu se podnosilac zahtjeva ovim putem obavještava.

U odnosu na tačku II izreke rješenja, utvrđeno je da su zahtjevom tražene informacije koje se odnose na materijale koji se pripremaju za sjednicu Vijeća, imaju interni karakter i nisu dostupni javnosti, u skladu sa članom 28. stav (7) Poslovnika VSTV-a BiH ("Službeni glasnik BiH", br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24"), stoga je u ovom dijelu zahtjeva odbijen pristup informacijama.

Naime, član 5. tačka c) Zakona o slobodi pristupa informacijama na nivou institucija Bosne i Hercegovine („Službeni glasnik BiH“, br. 61/23; u daljem tekstu: Zakon) propisuje da informacija podrazumijeva svaki sadržaj u posjedu institucije, zabilježen u bilo kojoj formi, a koji je institucija BiH sačinila, primijenila ili dobila nezavisno od vremena nastanka ili kategorizacije. Vlasnik informacije je institucija u okviru čijeg djelovanja je nastala informacija što su u konkretnom slučaju sudovi i tužilaštva.

U odnosu na traženu informaciju, ističemo da navedeni interni memorandum sadrži analizu koju nije sačinio VSTV BiH nego nadležni odjel na osnovu podataka vlasnika informacija i ona predstavlja samo alat, odnosno interni dokument odjela, a ne zvanični akt institucije, a koji je dostavljen Vijeću, u cilju pomaganja za donošenje određene odluke/zaključka u aktuelnom trenutku. Dakle, odluka/zaključak VSTV-a BiH doneseni su na osnovu predmetnog internog memoranduma, te diskusije i stavova članova Vijeća koji su rezultirala donošenjem zaključka o kojoj je javnost obaviještena objavom na web stranici VSTV-a BiH u kategoriji VSTV BiH/Sjednice/Izveštaji.

Predmet informacije sadrži pregled postupanja sudova i tužilaštava u pogledu ispunjavanja obaveze pravilnog evidentiranja i dostavljanja VSTV-u BiH odluka i izvještaja o zastarama u periodu 1.1.- 30.6.2024 godine, budući da su sudije i tužioci koji donesu odluku o okončanju postupka zbog nastupanja zastare krivičnog ili prekršajnog gonjenja u obavezni da u CMS-u odnosno TCMS-u izaberu predviđeni način završetka predmeta za ovu procesnu situaciju, odnosno da dostave svoju odluku o okončanju postupka zbog nastupanja zastare i izvještaj o toku postupka posredstvom predsjednika suda, odnosno glavnog tužioca. Odluke i izvještaji pravosudnih institucija o nastupanju zastare se, u skladu sa zaključkom Vijeća, dostavljaju na uvid i eventualno dalje postupanje Uredu disciplinskog tužioca, zbog čega tražene informacije nije moguće dostaviti i zbog eventualnog mogućeg vođenja disciplinskog postupka ili disciplinskih postupaka koji su u toku, a pokrenuti su (ili će biti pokrenuti) na osnovu podataka u ovim izvještajima u skladu sa članom 19. stav (5) Zakona.

Također napominjemo da se predmetni podaci odnose na zastare krivičnog i prekršajnog gonjenja samo za period 1.1.- 30.6.2024. godine, te ne predstavljaju kompletnu informaciju koju Vijeće u skladu sa svojim nadležnostima priprema na godišnjem nivou i koja je već godinama unazad, kao takva, dostupna javnosti. Dakle tražena informacija predstavlja samo dio informacije u vezi predmetne teme, koja je još uvijek u postupku izrade unutar više radnih tijela VSTV-a BiH, te bi njeno objavljivanje prije završetka cjelovite i konačne informacije moglo ozbiljno narušiti proces njene izrade, zbog čega se istoj ograničava pristup u skladu sa članom 19. stav (6) Zakona. Napominjemo da Vijeće ovu informaciju kao redovnu tačku dnevnog reda razmatra dva puta godišnje kada se podnose polugodišnji izvještaj o navedenoj tematici, nakon čega se potpuna informacija koja se odnosi na jednogodišnji period objavljuje u zvaničnom izvještaju VSTV-a BiH koji je dostupan na internet stranici Vijeća. S tim u vezi, napominjemo da će finalni podaci o zastarama krivičnih gonjenja biti dostupni u Godišnjem izvještaju VSTV-a BiH za 2024. godini, na uobičajeni način, diferencirano prema nazivu postupajućeg suda, vrsti i fazi krivičnog predmeta.

Postupajući po zahtjevu podnositeljice, a u skladu sa svim gore navedenim, odlučeno je kao u dispozitivu ovog rješenja.

**Pouka o pravnom lijeku:**

Protiv ovog rješenja podnositeljica zahtjeva ima pravo podnijeti žalbu Žalbenom vijeću pri Vijeću ministara Bosne i Hercegovine u roku od 15 dana od dana prijema istog.

Ukoliko Žalbeno vijeće ne odluči po žalbi u roku od 30 dana od dana prijema žalbe, podnositeljica žalbe ima pravo pokrenuti upravni spor pred Sudom Bosne i Hercegovine zbog šutnje administracije.



Dostavljeno:

1. Podnositeljici zahtjeva
2. Odjelu za pravosudnu analitiku i izvještavanje
3. Odjelu za pravna pitanja
4. U spis

